

Broj: 03-02-662/2024  
Sarajevo, 06.05.2024. godine

**PARLAMENT FEDERACIJE  
BOSNE I HERCEGOVINE**

- **Predstavnički dom -**  
**gđa. Mirjana Marinković - Lepić, predsjedavajuća**
- **Dom naroda -**  
**gosp. Tomislav Martinović, predsjedavajući**

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa članom 172. stav (1) Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i članom 164. stav (1) Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i usvajanja po skraćenom postupku, dostavljam Vam PRIJEDLOG ZAKONA O IZMJENAMA I DOPUNAMA ZAKONA O UPRAVLJANJU OTPADOM**, koji je utvrdila Vlada Federacije Bosne i Hercegovine na 33. sjednici, održanoj 30.04.2024. godine.

Prijedlog zakona se dostavlja na službenim jezicima i pismima Federacije Bosne i Hercegovine.

S poštovanjem,



- Prilog u printanoj i elektronskoj formi (CD):
- Prijedlog zakona na bosanskom jeziku,
  - Odredbe Zakona koja se mijenjaju i dopunjuju,
  - Izjava o usklađenosti,
  - Obrazac broj 2,
  - Obrazac IFP-NE,
  - Tabelarni prikaz rezultata javne rasprave i
  - Zakon o upravljanju otpadom  
(„Službene novine Federacije BiH“, br. 33/03, 72/09 i 92/17) (CD)

**Co: Federalno ministarstvo okoliša i turizma**  
**gđa. Nasiha Pozder, ministar**

Co: predmet

BOSNA I HERCEGOVINA  
FEDERACIJA BOSNE I HERCEGOVINE  
VLADA

PRIJEDLOG

ZAKON O IZMJENAMA I DOPUNAMA ZAKONA O  
UPRAVLJANJU OTPADOM

Sarajevo, april 2024. godine

## PRIJEDLOG ZA DONOŠENJE ZAKONA PO SKRAĆENOM POSTUPKU

U skladu sa članom 172. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08, 26/20 i 13/24) i članom 164. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), koji predviđaju da se zakon može donijeti po skraćenom postupku kad nije u pitanju složen i obiman zakon, predlažemo da se Zakon o izmjenama i dopunama Zakona o upravljanju otpadom, donese po skraćenom postupku, i to iz sljedeća dva razloga:

1. Implementacijom zakona od strane organa koji su nadležni za provođenje zakona ustanovljeno je da nedostaje provedbeni propis kojim se konkretnije uređuje problematika deponija otpada, tako da se u prijedlogu novim članom uređuje oblast koja se odnosi na deponije, a koja će biti detaljno definisana u provedbenom aktu čija će izrada uslijediti nakon stupanja na snagu ovog Zakona. Svjesni činjenice da je uređenje deponija važno i nužno potrebno, smatramo da se ova manjkavost aktuelnog zakona mora dopuniti.
2. Također, u izmjenama i dopunama ovog zakona u 2017. godini kao potpuno novi dio regulative uvedene su posebne kategorije otpada koje nisu bile u potpunosti podržane kaznenim odredbama u Zakonu, te se pristupilo uređenju istih u smislu definisanja iznosa novčanih kazni prema težini učinjenog prekršaja. Svjedoci smo da su često na javnim konferencijama i skupovima Ministarstvu od strane nadležnih organa uprave i relevantnih inspektorata, upućene inicijative za nužnost revidiranja odredbi ovog Zakona u ovom pogledu.

Usvajanjem predloženih izmjena i dopuna zakona stvaraju se pravne pretpostavke za pravilnu i potpunu primjenu Zakona u praksi, te će se procedurom skraćenog postupka ublažiti gore navedena problematika i u značajnoj mjeri unaprijediti rad svih karika u lancu kompleksne oblasti kao što je upravljanje otpadom.

## ZAKON O IZMJENAMA I DOPUNAMA ZAKONA O UPRAVLJANJU OTPADOM

### Član 1.

U Zakonu o upravljanju otpadom ("Službene novine Federacije BiH", br. 33/03, 72/09 i 92/17, u daljem tekstu: Zakon) u članu 3. stav (3) riječ „Upravljanje...“ zamjenjuje se riječima „Uvažavajući principe cirkularne ekonomije, upravljanje ...“

### Član 2.

U poglavlju II DEFINICIJE u članu 4. alineja 29. iza riječi „...otpada“, tačka zarez se zamjenjuje tačkom i dodaje se nova rečenica koja glasi:  
"Centri mogu biti općinski, međuopćinski i regionalni;"

### Član 3.

Iza člana 33. dodaje se novi član 33a. koji glasi:

#### „Član 33a.

- (1) Uvjeti za određivanje odlaganja otpada na deponije, način, postupci kontrole, praćenja i nadzor, kao i ostali tehnički uvjeti, uvjeti rada za deponije, način i uvjeti odlaganja otpada i način i uvjeti zatvaranja, propisat će se provedbenim propisom.
- (2) Odredbe propisa iz stava (1) ovog člana odnosit će se na sve vlasnike, odlagače, operatere, proizvođače i sva fizička i pravna lica koja u sklopu svoje djelatnosti vrše odlaganje otpada.“

### Član 4.

U članu 49. iza stava (1) dodaje se novi stav (2) koji glasi:

- (2) "Za posebne kategorije otpada za koje se naplaćuje naknada nadležan je Federalni tržišni inspektorat i Federalni urbanističko-ekološki inspektorat."
- Dosadašnji st. (2), (3) i (4) postaju st. (3), (4) i (5).

### Član 5.

Član 53. mijenja se i glasi:

#### „Član 53.

- (1) Novčanom kaznom od 10.000,00 KM do 20.000,00 KM kaznit će se za prekršaj svako pravno lice, a u ponovljenom prekršaju novčanom kaznom u iznosu od 15.000,00 do 25.000,00 KM ako:
  - ne pribavi dozvolu za aktivnosti upravljanja otpadom (član 12.) ili krši uvjete propisane u dozvoli;

- ne upravlja posebnom kategorijom otpada iz člana 18a. stav (2);
  - transportuje otpad tako da može izazvati zagađenje okoliša, suprotno odredbama člana 32. stav (1) ovog Zakona;
  - u slučaju zagađenja nastalog u toku transporta prevoznik ne obavi čišćenje i dovođenje u prvobitno stanje zagađenog područja suprotno odredbama člana 32. stav (2) ovog Zakona;
  - ne isporuči otpad na odredište koje je odredio pošiljalac, a koje je odobreno kao lokacija za upravljanje otpadom, suprotno odredbama člana 32. stav (3) ovog Zakona;
  - prevoznik u slučaju nemogućnosti isporuke na odredište ne vrati otpad pošiljaocu suprotno odredbama člana 32. stav (4) ovog Zakona;
  - transportuje otpad suprotno odredbi člana 32. stav (5);
  - odlaže otpad suprotno odredbi člana 33.;
  - vrši prekogranični promet otpada suprotno članu 39. stav (3).
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom od 2.000,00 KM do 4.000,00 KM, a u ponovljenom prekršaju novčanom kaznom u iznosu od 4.500,00 KM do 5.000,00 KM.
- (3) Za prekršaj iz stava (1) ovog člana kaznit će se lice koje obavlja samostalnu poslovnu djelatnost/obrt, novčanom kaznom u iznosu od 1.000,00 KM do 3.000,00 KM, a u ponovljenom prekršaju novčanom kaznom u iznosu od 4.000,00 KM do 6.000,00 KM.
- (4) Novčanom kaznom od 5.000,00 KM do 10.000,00 KM kaznit će se za prekršaj svako pravno lice, a u ponovljenom prekršaju novčanom kaznom u iznosu od 10.000,00 do 15.000,00 KM ako:
- ne dostavi Fondu ili operateru sistema redovni godišnji izvještaj i ako dostavi nepotpun ili netačan izvještaj iz člana 18a. st. (3) i (4);
  - ne dostavlja podatke u informacioni sistem upravljanja otpadom iz člana 37a.
- (5) Za prekršaj iz stava (4) ovog člana kaznit će se i odgovorno lice u pravnom licu novčanom kaznom od 1.000,00 KM do 2.000,00 KM, a u ponovljenom prekršaju novčanom kaznom u iznosu od 1.500,00 KM do 3.000,00 KM.
- (6) Novčanom kaznom u iznosu od 500,00 KM do 1.000,00 KM kaznit će se za prekršaj iz stava (4) ovog člana lice koje obavlja samostalnu poslovnu djelatnost/obrt, a u ponovljenom prekršaju novčanom kaznom u iznosu od 1.000,00 KM do 2.000,00 KM.
- (7) Novčanom kaznom u iznosu od 500,00 KM do 2.000,00 KM kaznit će se fizičko lice za prekršaj iz stava (1) ovog člana, a u ponovljenom prekršaju novčanom kaznom u iznosu od 3.000,00 KM do 5.000,00 KM.“

## Član 6.

U članu 58. iza stava (8) dodaje se novi stav (9) koji glasi:

„(9) Propis iz člana 33a. donijet će federalni ministar u roku od dvanaest (12) mjeseci od dana stupanja na snagu ovog Zakona.“

Dosadašnji st. (9) do (13) postaju st. (10) do (14).

## **Član 7.**

Ovaj Zakon stupa na snagu osmog dana od dana objave u „Službenim novinama Federacije BiH“.

**OBRAZLOŽENJE  
PRIJEDLOGA ZAKONA O IZMJENAMA I DOPUNAMA ZAKONA O  
UPRAVLJANJU OTPADOM**

**I - PRAVNI OSNOV ZA DONOŠENJE ZAKONA**

Pravni osnov za donošenje Zakona o izmjenama i dopunama zakona o upravljanju otpadom (u daljem tekstu: Zakon) sadržan je u odredbama člana IV.B.7. a) (IV) Ustava Federacije Bosne i Hercegovine.

**II - USKLAĐENOST SA ZAKONODAVSTVOM EVROPSKE UNIJE**

Ovim izmjenama i dopunama Zakona nije vršeno usklađivanje s propisima EU, jer se jedan dio izmjena odnosi na utvrđivanje inspeksijskog nadzora i kazni što je stvar nacionalne jurisdikcije svake zemlje i nije predmet usklađivanja sa zakonodavstvom EU. Međutim, drugi dio izmjena i dopuna ovog Zakona, tačnije odredbe novog člana 33a. i dopune člana 58. stav (9) koje se odnose na deponije, nakon stupanja na snagu ovog Zakona, moraju u formi provedbenih akata biti usklađene sa zakonodavstvom EU, te će se, u skladu s navedenim, prilikom izrade provedbenih propisa pristupiti usklađivanju istih s propisima EU.

**III - RAZLOZI ZA DONOŠENJE ZAKONA**

Zakon o upravljanju otpadom ("Službene novine Federacije BiH", br. 33/03, 72/09 i 92/17) donesen je s ciljem institucionalnog uređenja sektora upravljanja otpadom i izrade podzakonskih, odnosno provedbenih propisa, kako bi se u što većoj mjeri izvršilo usklađivanje zakona sa zakonodavstvom Evropske unije.

Implementacijom zakona od strane organa koji su nadležni za provođenje zakona ustanovljeno je da nedostaje provedbeni propis kojim se konkretnije uređuje problematika deponija otpada te se novim članom 33a. uređuje oblast koja se odnosi na deponije, a koja će biti detaljno definisana u provedbenom aktu čija će izrada uslijediti nakon stupanja na snagu ovog Zakona.

U prethodnim izmjenama i dopunama ovog Zakona bile su inkorporirane posebne kategorije otpada koje nisu bile u potpunosti podržane kaznenim odredbama, te se pristupilo uređenju istih u smislu definisanja iznosa novčanih kazni prema težini učinjenog prekršaja.

Usvajanjem predloženih izmjena i dopuna stvaraju se pravne pretpostavke za pravilnu i potpunu primjenu zakona u praksi.

Također, potrebno je istaći da su Federalnom ministarstvu okoliša i turizma, od nadležnih organa uprave i relevantnih inspektorata, upućene inicijative za nužnost revidiranja odredbi ovog Zakona.

#### **IV - OBRAZLOŽENJE PRAVNIH RJEŠENJA**

U članu 1., odnosno stavu (3) Zakona izvršena je dopuna tako da je uvršten pojam cirkularne ekonomije koja kao ekonomski model promoviše održivo iskorištavanje resursa putem smanjenja otpada, recikliranja, obnavljanja i ponovne upotrebe materijala i proizvoda, a koja ima u fokusu da se vrijednost proizvoda, materijala i resursa održava što je duže moguće te da se otpad i gubici svedu na najmanju moguću mjeru.

U članu 2. Zakona izvršena je dopuna pojma "Centar za upravljanje otpadom" na način koji je prema strategijama zaštite okoliša i terminologiji prihvatljiviji, u smislu da je navedeno koje vrste centara mogu biti u terminologiji zakonodavstva upravljanja otpadom, ali i s obzirom na činjenicu da se, osim u definiciji, na više mjesta u Zakonu navodi samo termin „regionalni centar“. Također, potrebno je napomenuti da se na ovaj način termini usklađuju s terminima koji su navedeni u strategijama zaštite okoliša.

U članu 3. Zakona izvršeno je detaljnije definisanje odredbe člana 33. kojem se dodaje novi član 33a. koji opisuje način odlaganja otpada i u kojem se navodi da će ova oblast biti uređena provedbenim propisom, jer se ukazala potreba za izradom podzakonskih provedbenih propisa kojima se uređuju uvjeti za određivanje odlaganja otpada na deponije, način, postupci kontrole, praćenja i nadzora, kao i ostali tehnički uvjeti, uvjeti rada za odlagališta otpada, način i uvjeti odlaganja otpada, zatvaranje deponije kao i definisanje lica na koja će se primjenjivati ovaj propis – sve vlasnike, odlagatelje, operatere, proizvođače i sva fizička i pravna lica koja u sklopu svoje djelatnosti vrše odlaganje otpada.

U članu 4. izvršena je dopuna člana 49. stav 2. koji se referiše na definisanje nadležnosti inspekcijskog nadzora za "noviju regulativu", a odnosi se na posebne kategorije otpada.

U članu 5. izvršeno je revidiranje odredbe člana 53. prethodnih st. 1., 2. i 4. (koji se odnose na kaznene odredbe za pravna lica) tako da su ovi članovi u značajnoj mjeri izmijenjeni, tačnije isti su razrađeni u šest stavova, dok je samo stav 3., koji se odnosio na fizička lica, ostao isti i koji je ponovljen u stavu (7). Odredba ovog člana odnosi se na propisivanje iznosa kazni koje su usklađene s iznosima propisanih kazni koje su navedene u odredbama Zakona o prekršajima Federacije BiH („Službene novine Federacije BiH“, broj: 63/14) te Zakona o prekršajima Bosne i Hercegovine („Službeni glasnik BiH“, broj: 41/22).

U članu 6. izvršena je dopuna člana 58. stav (2) koji se referiše na nadležnost i rokove donošenja propisa, odnosno provedbenih akata koji se odnose na član 33a., odnosno odlaganje otpada na deponije.

U članu 7. utvrđen je rok za stupanje na snagu zakona.

#### **V - JAVNE KONSULTACIJE**

Federalno ministarstvo okoliša i turizma je 5.4.2023. godine pokrenulo postupak javnih konsultacija na utvrđeni tekst putem njegovog objavljivanja na web stranici [www.fmoit.gov.ba](http://www.fmoit.gov.ba), s pozivom javnosti za dostavljanje primjedbi i sugestija u roku od 30 dana od dana prijema obavijesti ovog Ministarstva, s obzirom na to da predmetni propis ima ili može da ima značajan uticaj na javnost.



U postupku javnih konsultacija je bilo sugestija i komentara na Nacrt izmjena i dopuna Zakona o upravljanju otpadom i to od strane sljedećih pravnih subjekata:

1. Savez općina i gradova Federacije BiH,
2. Općina Kakanj - Stručna služba za poslove općinskog načelnika - Odsjek za inspekcije,
3. Ministarstvo za prostorno uređenje promet, komunikaciju i zaštitu okoline Zeničko-dobojskog kantona,
4. Federalno ministarstvo poljoprivrede vodoprivrede i šumarstva,
5. Federalno ministarstvo okoliša i turizma - Sektor za okolišne dozvole, procjenu uticaja na okoliš, registar zagađivanja,
6. Udruženje AARHUS CENTAR BiH,
7. JKP KOMB d.o.o. Bužim putem Ministarstva za građenje i prostorno uređenje i zaštitu okoliša Unsko-sanskog kantona.

#### **VI - MIŠLJENJA NADLEŽNIH ORGANA**

Ured za zakonodavstvo i usklađenost s propisima EU, Mišljenjem broj: 01-03-02/1-19-637-4/23 od 4.11.2023. godine,

Federalno ministarstvo pravde, Mišljenjem broj: 03-02-6-2452/23 od 25.8.2023. godine,

Federalno ministarstvo finansija, Mišljenjem broj: 06-02-4-5980/23 od 29.8.2023. godine.

#### **VII - FINANSIJSKA SREDSTVA**

Za provođenje ovog Zakona nisu potrebna dodatna novčana sredstva u Budžetu Federacije BiH.

("Službene novine Federacije BiH", br. 33/03, 72/09 i 92/17)

## TEKST ODREDBA ZAKONA KOJE SE MIJENJAJU I DOPUNJUJU

### Član 3.

#### Prioriteti u upravljanju otpadom

(1) Radi postizanja cilja i pravovremenog sprečavanja zagađivanja i smanjenja posljedica po zdravlje ljudi i okoliš, upravljanje otpadom vršit će se tako da se osigura:

- minimalno nastajanje otpada, a posebno svođenje opasnih karakteristika takvog otpada na minimum;
- smanjenje nastalog otpada po količini, posebno uzimajući u obzir tokove otpada;
- tretiranje otpada na način kojim se osigurava povrat sirovinskog materijala iz njega;
- spaljivanja ili odlaganja na deponije na okolinski prihvatljiv način onih vrsta otpada koje ne podliježu povratu komponenti, ponovnoj upotrebi ili proizvodnji energije.

(2) Kod utvrđivanja prioriteta iz stava 1. ovog člana uzet će se u obzir:

- ekološke beneficije,
- tehnička izvodljivost za korištenje najbolje raspoložive tehnologije,
- ekonomska izvodljivost.

(3) Upravljanje otpadom vršit će se tako da se preuzmu sve neophodne mjere koje osiguravaju tretman i odlaganje otpada bez ugrožavanja zdravlja ljudi i bez stvaranja štete ili prouzrokovanja značajnog rizika po prirodu, a naročito:

- bez rizika po vode, zrak, tlo, životinje i biljke;
- bez stvaranja smetnji putem buke ili mirisa;
- bez štetnog uticaja na prirodu ili mjesta koja su od posebnog interesa.

#### Član 4.

U smislu ovog zakona sljedeći izrazi znače:

"otpad" - znači sve materije ili predmete koje vlasnik odlaže, namjerava odložiti ili se traži da budu odložene u skladu sa jednom od kategorija otpada navedenoj u listi otpada i utvrđenoj u provedbenom propisu;

"komunalni otpad" - je otpad iz domaćinstva kao i drugi otpad koji je zbog svoje prirode ili sastava sličan otpadu iz domaćinstva;

"opasni otpad" - je svaki otpad koji je utvrđen posebnim propisom i koji ima jednu ili više karakteristika koje prouzrokuju opasnost po zdravlje ljudi i okoliš po svom porijeklu, sastavu ili koncentraciji, kao i onaj otpad koji je naveden u listi otpada kao opasni i reguliran provedbenim propisom;

"neopasni otpad" - je otpad koji nije definiran kao "opasni otpad";

"inertni otpad" - je otpad koji nije podložan značajnim fizičkim, hemijskim ili biološkim promjenama. Inertni otpad se neće rastvarati, spaljivati ili na drugi način fizički ili hemijski obrađivati, biološki razgrađivati ili nepovoljno uticati na druge supstance sa kojima dolazi u kontakt na način da prouzrokuje zagađenje okoliša ili ugrožavanje zdravlja ljudi. Ukupna vlažnost, sadržaj polutanata u otpadu i ekotoksičnost filtrata mora biti neznatna da ne bi došlo do ugrožavanja kvaliteta površinskih i podzemnih voda;

"Posebne kategorije otpada" su otpadne materije koje su važne bilo sa aspekta njihove štetnosti po okoliš i zdravlje ljudi, bilo po količinama koje nastaju i kao takve zahtijevaju posebno uređen način upravljanja od mjesta nastajanja, preko skupljanja, transporta i tretmana do konačnog zbrinjavanja;

"vlasnik" - je proizvođač otpada i fizičko ili pravno lice koje posjeduju otpad;

"proizvođač" - je bilo koje lice čijom aktivnošću se proizvodi otpad (originalni proizvođač) i/ili bilo koje lice koje obavlja predtretman, sortiranje ili druge operacije koje dovode do promjene fizičkih karakteristika ili sastava otpada;

"proizvođač i uvoznik proizvoda" je pravno lice koje na profesionalnoj osnovi razvija, proizvodi, prerađuje, obrađuje, prodaje, unosi ili uvozi, odnosno prvi stavlja na tržište Federacije BiH proizvode, uređaje i opremu, koji poslije upotrebe postaju posebne kategorije otpada;

"odlagač" - je bilo koje lice kojem se isporučuje otpad ili koje obavlja odlaganje takvog otpada;

"operator" - je fizičko ili pravno lice odgovorno za bilo koju vrstu aktivnosti upravljanja otpadom;

"operater sistema" je pravno lice koje po principu "produžene odgovornosti proizvođača" ispunjava ciljeve za reciklažu i iskorištenje posebnih kategorija otpada; može biti osnovan isključivo od pravnih lica koja obavljaju svoju poslovnu djelatnost stavljanjem u promet proizvoda koji postaju posebne kategorije otpada;

"upravljanje otpadom" - znači sistem aktivnosti i radnji vezanih za otpad, uključujući prevenciju nastanka otpada, smanjivanje količine otpada i njegovih opasnih karakteristika, tretman otpada, planiranje i kontrolu aktivnosti i procesa upravljanja otpadom, transport otpada, uspostavljanje, rad, zatvaranje i održavanje uređaja za tretman otpada nakon zatvaranja, monitoring, savjetovanje i obrazovanje u vezi sa aktivnostima i radnjama na upravljanju otpadom;

"tretman" - znači fizičke, termalne, hemijske ili biološke procese, uključujući sortiranje koji mijenjaju karakteristike otpada u cilju smanjivanja količine ili opasnih osobina, olakšavaju rukovanje ili povećavaju povrat komponenti otpada;

"povrat komponenti" - znači povrat materijala i energije iz iskorištenih proizvoda ili otpada u privredni sistem primjenom određenog tehnološkog postupka ili spaljivanjem;

"ponovno korištenje" - znači svaku aktivnost kojom se otpad upotrebljava za namjenu za koju je prvobitno korišten;

"skupljanje" - znači sistemsko skupljanje i po mogućnosti sortiranje otpada u cilju olakšanja budućeg tretmana;

"transport" - znači promet otpada van postrojenja;

"skladištenje" - znači ostavljanje otpada od proizvođača unutar postrojenja i pogona, a najviše tri godine na način koji isključuje opasnost po okoliš i ljudsko zdravlje;

"odlaganje" - znači bilo koju aktivnost utvrđenu u provedbenom propisu;

"deponija" - znači mjesto odlaganja otpada u svrhu konačnog odlaganja na površini ili ispod površine zemljišta uključujući:

- unutrašnja mjesta za odlaganje (npr. deponije gdje proizvođač otpada zbrinjava vlastiti otpad na mjestu nastanka) i

- stalna mjesta (npr. više od jedne godine) koja se upotrebljavaju za dugogodišnje odlaganje otpada, ali isključujući:

- objekte gdje nije dozvoljeno skladištenje otpada, a otpad je spreman za daljnji transport u cilju ponovnog korištenja, tretmana ili odlaganja na drugom mjestu,

- prethodno skladištenje otpada za ponovnu upotrebu ili tretman za period po pravilu manji od tri godine ili

- prethodno skladištenje otpada za odlaganje u periodu manjem od jedne godine;

"biorazgradivi otpad" - je svaki otpad koji je pogodan za aerobnu ili anaerobnu razgradnju kao što je hrana, vrtni otpad, papir i karton;

"tečni otpad" - je svaki otpad u tečnoj formi isključujući mulj;

"centar za upravljanje otpadom"- je sistem građevina i uređaja za tretman, povrat komponenti i/ili zbrinjavanje otpada;

"zbrinjavanje otpada" - je svaki postupak tretmana ili odlaganja otpada u skladu sa odredbama ovog Zakona.

### **Član 33. Odlaganje i tretman otpada**

(1) Načini odlaganja i tretmana mogu biti:

- odlaganje na lokaciji deponije,

- termički tretman;

- druge hemijske, biološke ili fizičke tretmane.

(2) Prioritet u izdavanju potrebnih dozvola za nove deponije imaju regionalne deponije.

(3) Sastavni dio deponija je centar za upravljanje otpadom.

#### **Član 49.**

(1) Nadzor nad aktivnostima upravljanja otpadom i ispunjenjem uvjeta iz dozvole u skladu s odredbama ovog Zakona i propisa donesenih na osnovu njega vrše inspektori zaštite okoliša i tržišno, turističko-ugostiteljski inspektor; na federalnom nivou - federalni inspektor i na kantonalnom nivou - kantonalni inspektor (u daljem tekstu: inspektor).

(2) Inspektor iz stava 1. ovog člana jednom godišnje vrši nadzor nad radom kantonalnih operatera za upravljanje otpadom i proizvođačima opasnog otpada u skladu s posebnim propisima.

(3) Inspektor iz stava 1. ovog člana obavještava proizvođača i operatera prije vršenja inspekcijskog nadzora.

(4) U slučaju neposredne opasnosti po zdravlje ljudi i okoliš inspektor će izvršiti nadzor bez prethodnog obavještenja.

#### **Član 53.**

(1) Novčanom kaznom u iznosu od 10.000,00 KM do 40.000,00 KM kaznit će se za prekršaj svako pravno lice, a u ponovljenom prekršaju novčanom kaznom u iznosu od 50.000,00 KM do 100.000,00 KM, ako:

- transportuje otpad na način koji može izazvati zagađenje okoliša, suprotno odredbama člana 32. stav 1. ovog zakona;
- u slučaju zagađenja nastalog u toku transporta prijevoznik ne obavi čišćenje i dovođenje u prvobitno stanje zagađenog područja suprotno odredbama člana 32. stav 2. ovog zakona;
- ne isporuči otpad na odredište koje je odredio pošiljaoc, a koje je odobreno kao lokacija za upravljanje otpadom suprotno odredbama člana 32. stav 4. ovog zakona;
- prijevoznik u slučaju nemogućnosti isporuke na odredište ne vrati otpad pošiljaocu suprotno odredbama člana 32. stav 5. ovog zakona;
- ne pribavi dozvolu za aktivnosti upravljanja otpadom (Član 12.) ili krši uvjete propisane u dozvoli;
- ne postupi u skladu sa članom 24.;
- redovno ne obavještava nadležni organ o otpadu preuzetom na tretman (Član 29.);

- koristi otpad suprotno odredbi člana 31.;
- odlaže otpad suprotno odredbi člana 33.;
- vrši prekogranični promet otpada suprotno članu 39. stav 3.

(2) Novčanom kaznom u iznosu od 2.000,00 KM do 5.000,00 KM kaznit će se za prekršaj iz stava 1. ovog člana odgovorno lice u pravnom licu, a u ponovljenom prekršaju kaznom u iznosu od 6.000,00 KM do 10.000,00 KM.

(3) Novčanom kaznom u iznosu od 500,00 KM do 2.000,00 KM kaznit će se fizičko lice za prekršaj iz stava 1. ovog člana, a u ponovljenom prekršaju novčanom kaznom u iznosu od 3.000,00 KM do 5.000,00 KM.

(4) Novčanom kaznom u iznosu od 1.000,00 KM do 3.000,00 KM kaznit će se lice koje obavlja samostalnu poslovnu djelatnost - obrt, za prekršaj iz stava 1. ovog člana, a u ponovljenom prekršaju novčanom kaznom u iznosu od 4.000,00 KM do 5.000,00 KM.

#### **Član 58.**

- (1) Propis iz člana 8. stav 1. donijet će Parlament Federacije BiH u roku od 18 mjeseci od stupanja na snagu ovog Zakona.
- (2) Propise iz čl. 14., 24., 44. stav 2. i 48. stav 2. donijet će Vlada FBiH u roku od godinu dana od dana stupanja na snagu ovog Zakona.
- (3) Propise iz člana 18a. st. 4. i 5. donijet će Vlada FBiH u roku od dva mjeseca od dana stupanja na snagu ovog Zakona.
- (4) Propise iz člana 18a. stav 3. donijet će ministar u roku od godinu dana od dana stupanja na snagu ovog Zakona.
- (5) Propis iz člana 37a. stav 2. donijet će Vlada FBiH u roku od dva mjeseca od dana stupanja na snagu ovog Zakona.
- (6) Propis iz člana 17. donijet će federalni ministar u roku od godinu dana od dana stupanja na snagu ovog Zakona.
- (7) Propise iz čl. 1. alineje 1., 13. st. 4., 22. stav 2., 29. stav 4., 36. stav 1. i 55. donijet će federalni ministar u roku od šest mjeseci od dana stupanja na snagu ovog Zakona.

(8) Propisi koji se tiču:

- aktivnosti upravljanja otpadom i zadataka koji se odnose na klinički otpad;
- aktivnosti upravljanja otpadom i zadataka koji se odnose na ljudske lijekove;
- zahtjeva javnog zdravstva za različite aktivnosti i operacije upravljanja otpadom;
- provođenja člana 17.

donijet će federalni ministar u saradnji s federalnim ministrom zdravlja u roku od godinu dana od dana stupanja na snagu ovog Zakona.

(9) Propis iz člana 38. stav 2. donijet će federalni ministar u roku od tri mjeseca od dana stupanja na snagu ovog Zakona.

(10) Propis iz člana 4. stav 1. iz definicije za "otpada" bit će donesen u roku od šest mjeseci od dana stupanja na snagu ovog Zakona.

(11) Provedbeni propis iz člana 16. koji se tiče građevinskog otpada donijet će federalni ministar u saradnji s federalnim ministrom prostornog uređenja u roku od godinu dana od dana stupanja na snagu ovog Zakona.

(12) Propisi koji se tiču:

- posebnih zahtjeva za biorazgradive poljoprivredne otpade;
- uvjeta i zahtjeva za korištenje kanalizacionog mulja u poljoprivredi;
- uvjeta i zahtjeva za životinjski otpad (Član 1. stav 2.);
- uvjeta i zahtjeva za ostatke i otpade nastale proizvodnjom i korištenjem hemikalija u poljoprivredi;

donijet će federalni ministar u saradnji s federalnim ministrom poljoprivrede, vodoprivrede i šumarstva u roku od godinu dana od stupanja na snagu ovog Zakona.

(13) Propis iz člana 9. donijet će zakonodavno tijelo kantona u roku od dvije godine od stupanja na snagu ovog Zakona.